



Dobrota i čistoća srca (Medina)

Hatib: dr. Ahmed ibn Talib ibn Abdulhamid

23. redžeb 1443. po Hidžri / 25. februar 2022.

Sva hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, jedinog, koji druga nema, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik, neka su na njega i na njegovu porodicu Allahova milost i blagoslov.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio.” (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri novotarije, svaka novotarija je zabluda, a svaka zabluda vodi u Vatru. O vjernici, ono što Milostivi gleda kod čovjeka jeste njegovo srce koje je skriveno u njegovom tijelu, a ono što dolazi iz njegovog srca, dobro ili loše, mjerit će se na Vagi. Uzvišeni kaže: “Onaj u koga njegova djela budu teška – u ugodnu životu će živjeti, a onaj u koga njegova djela budu lahka – boravište će mu bezdan biti. A znaš li ti šta će to biti? – Vatra užarena!” (El-Kariah, 6–11)





Džennet će se približiti svakom bogobojaznom, odanom svom Gospodaru, koji se mnogo kaje, onome koji se Njemu vraća, brižnom, koji čuva Allahove granice, koliko god je to moguće. Uzvišeni kaže: “A Džennet će biti primaknut čestitima, neće biti ni od jednog daleko – ‘Ovo je ono što vam je obećano, svakome onome koji se kajao i čuvao, koji se Milostivoga bojao, iako Ga nije vidio, i koji je srce odano donio. Uđite u nj, u miru, ovo je Dan vječni!’ U njemu će imati što god zažele – a od Nas i više.” (Kaf, 31–35)

On će biti obradovan gledanjem u Allahovo plemenito lice, a radosna vijest u Kur’anu je za svakoga onoga ko shvati opomenu, slijedi Kur’an i Milostivog se boji. Uzvišeni kaže: “Tvoja opomena koristit će samo onome koji Kur’an slijedi i Milostivoga se boji, iako Ga ne vidi; njega obraduj oprostom i nagradom lijepom!” (Jasin, 11)

Ko je svjestan nadzora Silnog i Sveznajućeg, doći će pred Plemenitog onako kako je to Ibrahim molio Allaha, džellešanuhu: “... i ne osramoti me na Dan kad će ljudi oživljeni biti, na Dan kada nikakvo blago, a ni sinovi od koristi neće biti. Samo će onaj koji Allahu srca čista dođe spašen biti.” (Eš-Šuara, 87–88) Čisto srce je ono srce koje se spasilo od niskih strasti i otrovnih sumnji i koje se zaštitilo Allahovom zaštitom, kao što je kazao Allahov Poslanik, sallallahu alejhi ve sellem: “Halal je jasan i haram je jasan, a između njih ima sumnjivih stvari koje većina ljudi ne poznaje. Onaj ko se čuva sumnjivog, sačuvao je svoju vjeru i čast, a ko upadne u sumnjive stvari, on je upao u haram. Poput pastira koji ima svoje stado i čuva ga oko zabranjene zemlje i malo nedostaje da ovce krenu u zabranjeno. Zaista svaki vladar ima zabranjeni posjed i zaista su Allahove zabrane ono što je učinio zabranjenim. Zaista u tijelu ima jedan komad mesa, ako je on ispravan, ispravno je cijelo tijelo, a ako je loše, čitavo je tijelo loše. Zaista je to srce.” Allah se smilovao čovjeku koji opominje i kori svoju dušu, koji je “zauzda” i obaveže da se čvrsto drži Allahove Knjige i uzme je za svoga vođu, i onome koji učenjem Kur’ana otkloni hrđu sa svoga srca, raznježi ga brigom o siročadima i dijeljenjem hrane siromašnima i osvjetli ga ustrajnim spominjanjem Allaha, džellešanuhu. Ko spominje Allaha, bit će spomenut, a ko bude





spomeut, bit će prepoznat kod stanovnika nebesa. Uzvišeni kaže: “Sjećajte se vi Mene, i Ja ću se vas sjetiti, i zahvaljujte Mi, i na blagodatima Mojim nemojte neblagodarni biti!” (El-Bekara, 152)

O vjernici, nema nijednog čovjeka a da mu nisu data dva oka na licu, kojima vidi dunjaluk, i dva oka u srcu kojima vidi ahiret, i kada Allah nekome želi dobro, On otvori njegova dva oka koja su u srcu da njima može vidjeti Allahovo “nevidljivo” obećanje, i tako se nevidljivim uvjeri u nevidljivo, a ako mu želi nešto drugo, ostavi ga onakvim kako jeste. Uzvišeni kaže: “Kako oni ne razmisle o Kur’anu, ili su im na srcima katanci!” (Muhammed, 24) A zar katanci na srcima nisu zbog nemara? I zbog toga što su ostala bez podsjetnika koji će ih uputiti njihovom Gospodaru? Kako će srca koja su opsjednuta ljubavlju prema dunjaluku zaploviti u duhovna prostranstva i vratiti se svojim vlasnicima s predivnim plodovima? Kako će se srce osloboditi ljubavi prema dunjaluku, a oči čežljivo gledaju ukrase onih koji su zaljubljeni u njega, a uši pažljivo slušaju njihove kitnjaste riječi, i tako ostaju uskraćene za mudrost koja se ne može utisnuti na bjelinu srca osim tintom Božije svjetlosti. Kada srce ostane bez mudrosti, njime ovlada neznanje sve dok ga ne umrtvi i učini ga poput stoke, koja spava punim očima, jede punim stomakom, smije se punim ustima, u danu trči za dunjalukom, a noću se zabavlja. “Mi smo za Džehennem mnoge džine i ljude stvorili; oni srca imaju – a njima ne shvataju, oni oči imaju – a njima ne vide, oni uši imaju – a njima ne čuju; oni su kao stoka, čak i gori – oni su zaista nemarni.” (El-A’raf, 179) Nemarni su lažljivci čije su riječi i djela neiskreni. “Ima ih koji su se obavezali Allahu: “Ako nam iz obilja Svoga dade, udjeljivat ćemo, zaista, milostinju i bit ćemo, doista, dobri!” A kad im je On dao iz obilja Svoga, oni su u tome postali škrti i okrenuli se – a oni ionako glave okreću. I nadovezao im je On na to pritvornost u srcima njihovim sve do Dana kada će pred Njega stati, zato što se onoga što su Allahu obećali ne pridržavaju i zato što stalno lažu. Zar oni ne znaju da Allah zna ono što oni u sebi kriju i ono o čemu se sašaptavaju i da je Allah znalac svega skrivenog?” (Et-Tevba, 75–78) Laž im je zatvorila sve pristupe dobru. Uzvišeni kaže: “Allah je zapečatio srca njihova i uši njihove, a pred očima njihovim je koprena; njih





čeka patnja golema. Ima ljudi koji govore: ‘Vjerujemo u Allaha i u onaj svijet!’ – a oni nisu vjernici. Oni nastoje prevariti Allaha i one koji vjeruju, a oni i ne znajući, samo sebe varaju. Njihova srca su bolesna, a Allah njihovu bolest još povećava; njih čeka bolna patnja zato što lažu.” (El-Bekara, 7–10) Kako može vidjeti srce koje je zapečaćeno? Uzvišeni kaže: “... ali, oči nisu slijepe, već srca u grudima.” (El-Hadždž, 46)

Kome se podastru uzroci i dokazi Pravog puta, i ne “progleda”, bit će kažnjen tvrdoćom srca. “Mi smo rekli: ‘Udarite ga jednim njezinim dijelom!’ – i eto tako Allah vraća mrtve u život i pruža vam dokaze Svoje da biste shvatili. Ali srca vaša su poslije toga postala tvrda, kao kamen su ili još tvrđa, a ima i kamenja iz kojeg rijeke izbijaju, a ima, zaista, kamenja koje puca i iz kojeg voda izlazi, a ima ga, doista, i koje se od straha pred Allahom ruši. A Allah motri na ono što radite.” (El-Bekara, 73–74)

“O vjernici, bojte se Allaha i budite s onima koji su iskreni!” (Et-Tevba, 119)

Znajte da vam je Uzvišeni naveo veličanstven primjer, koji pojašanjava vaše stanje i uzrok vašeg spasa, a taj primjer prenio nam je Njegov Poslanik, sallallahu alejhi ve sellem, rekavši: “Allah navodi primjer Pravog puta, s njegove desne i lijeve strane su zidovi na kojima su otvorena vrata, a na vratima su spušteni zastori. Na početku tog puta stoji glasnik koji govori: ‘O ljudi, krenite ovim putem svi i nikako ne skrećite s njega!’ Iznad puta stoji drugi glasnik koji, ako neko pokuša skinuti zastor sa kapije, govori: ‘Teško tebi, ne otvaraj ta vrata, jer ako ih otvoriš, otići ćeš u ponor!’ Taj put je islam, njegovi zidovi su Allahove granice, vrata sa zastorom su Allahove zabrane, glasnik na početku puta je Allahova Knjiga, a glasnik iznad puta je glas imana u srcu svakog vjernika.” Uzvišeni kaže: “U tome je, zaista, pouka za onoga ko razum ima ili ko sluša, a priseban je.” (Kaf, 37)

O vjernici, donosite salavate i selame na najbolje stvorenje i najbogobojaznijeg čovjeka, Muhammeda, sallallahu alejhi ve sellem, to vam je naredba od vašeg Gospodara Koji je rekao: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

